

## **Repons Deba lo Bidze 2019**

### **Minis pour Finans, Komers, Lenvestisman ek Planifikasyon Ekonomik**

Msye Spiker,  
Onorab Lider Lopoziyon,  
Onorab Lider Zafer Gouvernman  
Manm Onorab Lasanble Nasyonal,  
Ser konpatriyot Seselwa,

Bonzour

Pandan sa dernyen trwa zour, monn ekout bokou e monn ekout atantivman deba par bann manm onorab lo diskour bidze 2019. Gouvernman in osi ganny pwennvi bokour sekter e dimoun an zeneral. Mon konstate ki bokou in ganny dir pandan sa bann deba e mon oule asir sa lasanble ki Gouvernman pour travay pli dir pou fer sir ki sa plan pour bidze 2019 i ganny realize.

Msye Spiker, permet mwan pour reponn enn de bann size ki bann manm onorab in leve pandan sa deba. Bann lezot pwen pou osi ganny leve pandan staz komite bidze 2019 e bann Minis konsernen i ava adrese.

Msye Spiker, mon oule asir sa Lasanble parey mon tin annonce dan bidze 2019, ki Gouvernman pe atyelman travay lo en Vizyon ziska 2033 pour Sesel. Nou ti prezant sa draf vizyon ek bann stakeholders Vandredi le 2 Novanm 2018, 9 er bomaten ziska 12.30 kot lasal numero 1 ICCS. Nou ti envit Lasanble Nasyonal pour partisip dan en dialog pour prepar sa draf vizyon 2033. Me ziskan prezan nou pankor ganny zot partisipasyon.

Alor mon anplor sa Lasanble, pou ki Departman Planifikasyon Ekonomik i ganny en letan avek Lasanble Nasyonal pour diskit sa propozisyon avan ki nou finalize e lans sa plan an Zanyve 2019. I enportan ki zot donn zot kontribisyon lo sa plan Nasyonal.

Msye spiker mon oule donn enpe plis detay lo sa estimasyon kou konstriksyon lo sa proze 3,000 lakaz kin ganny prozekte pour kout SR 3.02 bilyon. E sa i baze konm swivan:

- SR 2.14 bilyon (swa 71% kou proze) pou konstriksyon bann lakaz. An mwayenn sa i fer SR 713,501 par younit. Pli spesifikman nou estimasyon i baze lo en kou konstriksyon mwayenn pou batiman a SR 7,550 par met kare. Nou alor espekte konstriksyon en younit 3 lasanm a en kou SR 755,000 par younit, e en younit 2 lasanm a en kou SR 641,773 par younit.
- SR 610 milyon pou kou lenfrastriktir asosye avek bann diferan lokasyon. Sa i reprezant 20% kou proze. Kou lenfrastriktir i varye depandan lo lokasyon, i annan landrwa ki annan bokou *retaining wall* ek semen pou konstri, i annan landrwa kot stasyon tretman *sewerage* i bezwen ganny konstri. Kou lenfrastriktir i alor kapab varye ant 4% (pou en redevlopman Saint Louis ki obor tou servis) ziska 37% (pou en proze Bel Air kot teren i demann bokou *retaining walls* avek ekstansyon laliny *sewerage*) par egzantp.

- SR 275 milyon koman *contingencies* pou bann kou ki pann prevwar. Proze i lo en dire 6 zan, alor i posib ki pou annan logmantasyon pri, kou estimasyon i osi baze lo bann teren kinn idantifye me avan survey e plan detaye i ganny fer, alor propozisyon bidze in bezwen enpe konservativ.

Sa i fer sa total bidze pou proze sa 3,000 lakaz prozekte a SR 3.02 bilyon.

Msye Spiker, bokou in ganny dir lo koripsyon. Mon oule asir sa lasanble ki nou agaze pour nou travay avek Konmisyon Anti-Koripsyon pour fer sir nou donn li tou sipor nesaser ki i bezwen. Nou pe fer sa avek son lenvestigasyon dan sa 50 milyon dolar ameriken.

Konsernan konsern releve lo revè lo taks lo lavyann poul ek pork, I enportan pou fer distenksyon e klarifikasyon lo sif egzakt sa logmantasyon:

- Taks lenportasyon aktyel lo poul i kenz pousan e senk rroupi par kilo (15%+SR5kg) ki pou ganny revize pou vinn 15

poursan e senk rounpi katreven douz sou par kilo (15%+SR5.92kg). Sa I reflekte selman en logmantasyon katreven douz sou par kilo (SR0.92).

- Lo lavyann pork, Taks lenportasyon aktyel i ken z poursan (15%) ki pou ganny revize pou vin ken z poursan e trwa rounpi par kilo (15%+ SR3/kg). Sa i reflekte en logmantasyon trwa rounpi par kilo (SR3/kg).

Sa bann logmantasyon in ganny propoze par Minister responsab pour Lagrikiltir, dan son zefor pou relev prodiksyon lokal. Sa i en mezir parmi plizyer lezot ki sa Minister in antrepann, dan en zefor pou ankouraz fermye pou agrandi zot nivo prodiksyon aktyel. I en mezir pou asir sekirite alimanter pour nou pei, pour kree plis lanplwa e anmenn valer dan nou prop lekonomi.

Vi ki taks lenportasyon lo poul ti deza annan en serten nivo provizyon vize anver protez prodiksyon lokal, sa ogmantasyon kin ganny propoze pou tanporer, an prenan kont bann lezot mezir ki Minister Lakriltir pe al antrepann.

Msye Spiker, aktyelman Sesel i depan bokou lo lenportasyon, e gouvènmman i bezwen fer tou zefor ki i kapab pou redwir sa depandans. Relevman prodiksyon lokal dan lavyann debaz, i enn bann mezir ki pou ede redwir sa depandans lo lenportasyon. Sa i ava ede pou anmenn en rediksyon lo demann pour deviz etranzer, anvi ki lannen pase noun enport lavalè SR 81.1 milyon rounpi lavyann poul ek pork, ki en sonm alarman.

Msye Spiker, lavyann pork e poul lokal i pli organik e pli bon pour nou lasante konpare avek lavyann enporte ki nou pa konnen ki kantite hormone in ganny enzekte dan sa bann lavyann.

En logmantasyon dan prodiksyon lavyann i osi bon pou sekter rekolt. Sa i akòz i redwir nou depandans lo langre, avè ki agrikiltè i ganny akse avek plis fimyen a en pri pli abòrdab.

Lenformasyon ki Labank Santral i annan i montre ki resaman, i annan logmantasyon kontinyel dan loan ki labank komersyel i donn sekter prive. Alafen Septanm sa lannen, la kantite kredi ki bann labank inn pret sekter prive ti ogmant par SR819 milyon

ouswa 14.2% konpare avek Septanm 2017. Konpare avek Desann 2017, sa logmantasyon ti SR551 milyon ouswa 9.1% letan nou konpar li lo Desann 2016. Sa bann loan i prensipalman pou finans konsomasyon.

Lentere ki bann labank komersyal i sarz zot kliyan i sipoze ganny enflianse par polisi moneter ki pran konsiderasyon prensipalman risk lenflasyon. I enportan ki lentere dan bann labank komersyal i aziste ek lanvironman aktyel dan lekonomi pou siport en nivo kwasans ki soutenab. Alafen 2016, to lentere lo lon (total) ti an mwayenn 12.42%. 2017, to lentere ti desann pu ariv 12.05%. Apre ki Labank Santral ti aziste son polisi moneter pou adres risk lenflasyon dan dezyenm kar sa lannen, noun vwar en logmantasyon dan to lentere pou arriv an mwayenn 12.38% a lafen Septanm 2018.

Dan ka mortgage lon, ki pa ganny konsidere konman loan pou konsonmasyon, to lentere an mwayenn inn desann sorti 10.19% alafen 2016 pou ariv 9.91% an 2017 e 9.63% alafen Septanm 2018. An sa ki konsern lakantite mortgage loan ki bann labank komersyal inn donnen, sa ti ogmant par SR152 milyon ouswa

21% an Septanm 2018 konpare avek Desanm 2017. Konpare avek Septanm 2017, sa logmantasyon ti SR196 milyon ouswa 29%.

Msye Spiker, pou donn enn de legzanp lo bann to lentera ki ganny aplike lo bann mortgage lon par bann labank komersyal. Sa bann statistiks i lo website labank santral:

1. Nouvo banq ti pe ofer en mortgage lon an Desanm 2016 lo en to lentera 7.5% e en peryod repeyman maximum pour 25 an. Sa inn ganny revezi e le 2 Novanm i 5% e 30 an.
2. MCB ti pe ofer en mortgage lon an Desanm 2016 lo en to lentera 9.0% e en peryod repeyman maximum pour 30 an. Sa inn ganny revezi e le 2 Novanm i 7.5% e 30 an.

Msye Spiker, letan nou regard kwa ki i annan pour bann biznes dan bidze 2019, mon pou donn enn de legzanp;

1. Nou pou kontinyen avek sibvansyon lo lon pour bann SMEs. Sa sibvansyon i lo zot lon anba SR 3 milyon.
2. Noun anons bokou incentives pour sekter lagrikiltir.



3. Nou pe donn resours adisyonnèl Biro Prokirer Zeneral ki i ava ede anmenn plis lezislasyon an 2019.
4. Biro Rezistrar Zeneral in osi ganny resours adisyonnèl.
5. Dezyenm kab soumaren ver 2020 a fini ganny enstale
6. 15 milyon dolar blue bond
7. En National payment switch ki ava ede dan metod peyman elektronik e redwir kou.
8. Teknolozi Finansyel (Fintech) ki ava anmenn plis prodwir pour sekter finansyel
9. 34 milyon Ero lenvestisman pour agrandir e moderniz por komersyal, sa i ava ede pour devlop komers dan Sesel.
10. Enn de bann depans ki pe direktèman tous sekter prive dan sekter Lasante ek Sekter Ledikasyon i konm swivan;
  - a. Provizyon sekter sekirite SR 50.3milyon
  - b. Provizyon servis netwayaz SR 49.4 milyon
  - c. Lokasyon lakaz SR 70.8 milyon

Msye Spiker, sa dis legzanp i zis enn de legzanp me i annan bokou e sekter prive i bezwen asiz ek sa bidze e nou pare pou ede pour fer sir ki nou al an detay e nou popilasyon i konpran son konteni.

Pour 2019, Biro Rezistrar Zeneral in ganny finansman pou en total 11 pozisyon e osi lofis ki Air Seychelles ti ete kot Independence House. Sa, ansanm ek sa lofis adisyonnal pou ede dan son zefor pou amelyor son servis. Osi dan son plan, i pou kree en ‘collateral registry’. Atraver sa, bann labank ek bann lezot lentitasyon finansyel a kapab anrezistre bann ‘pledges’ lo bann ‘movables’ online. Nou ekspekte ki sa pou kontribye anver zefor gouvernman pou fasilite lanvironman biznes.

Msye Spiker, nou pe kontinyen avek sanzman ki annonse dan bidze 2019 pour SBFA. An mezir ki nou fer sa tranzisyon ek Labank Devlopman, nou osi pour fer sir ki sa bann write off kin ganny fer pou bezwen ganny revwar. Tou mezir nesaser pou bezwen ganny pran pou kolekte sa bann larzan kin ganny write off.

Msye Spiker, parey noun anonse dan diskour bidze, tou bann travayer gouvernman ki pa lo en kontra avek ‘Public Sector Commission’, pou benefisyer avek en ‘long service allowance’ a parti Zilyet 2019. Par kont, tou travayer ki lo kontra, zot pou benefisyer avek zot ‘end of contract payment’ ki pou prezan

ganny kalkile lo zot ‘allowance’ osi, anvi ki avan sete selman saler de baz ki ti pe ganny enkli dan formil kalkilasyon.

An se ki konsern, sa ‘long service allowance’ pour bann travayer ki pa lo kontra pou prezan benefisyé plis, konpare ek bann travayer ki lo kontra, Msye Spiker, les mwan met sa an perspektiv.

En travayer ki lo kontra i normalman dapre rekonmandasyon lorganizasyon ki anploy li, pou vin lo en kontra si i par lao Band 6, savelir saler de baz par lao SR11,186. E avek sa, tou le de zan ouswa trwa zan (pour bann Direkter Zeneral e sef egzektiv) saler en staff lo kontra i ganny ogmante apre ‘appraisal’ dapre son performans ‘up to 10%’ lo son saler de baz.

Sa i vedit, en staff ki ganny li SR11,186, si i perform eksepsyonnelman byen, e i ganny li en logmantasyon 10% i pou ganny li en logmantasyon SR1,118.60. Sa i pou osi aplikab pou tou le de zan, kan i renouvlye son kontra. Sa logmantasyon i en performans alawenns mansyel. Msye Spiker konpare avek en travayer ki pa lo kontra, ki fer li 5 an servis ki pou ganny li

SR500 e enn ki fer 10 an servis ki pou gany li SR1,000, sa enn lo kontra pa pe ganny dezanvantaze. En travayer ki lo kontra i osi ganny en performans 5% pandan sa lannen ki i pa ganny son peyman end of contract.

Mon pou donn en legzanp en travayer ki ganny SR 11,186 e adisyonnelman en inducement alawenns SR 3,000 dapre bann skim saler. Sa travayer pandan 4 an, pou ganny peyman end of contract de fwa, performans gratite ki 5% de fwa, e osi en logmantasyon SR 1,118.60 pandan 24 mwan. Alors son benefis adisyonnell pour ariv SR 150,706.92.

Par kont en travayer kin travay pandan 30 an ki pa lo kontra pou ganny li en alawens pour long servis ki pandan 4 an pour ariv en total benefis SR 144,000. Me si en travayer in fer plis ki 35 an ouswa 40 an, sa travayer pandan 4 an pour ganny en total benefis SR 168,000 ou SR 192,000. I annan 388 travayer ki annan plis ki 35an ou plis ki pou benefisyek sa long servis alawenns.

Bann travayer kin travay plis ki 30 an e plis dan Gouvernman ki lo kontra son saler de baz i plis ki SR 11,186. Alor, Msye Spiker mon kwar ki tin ler nou get en kou travayer ki pa lo kontra ki kapab fer de lannen lo menm pozisyon san en kad striktire ki pou rekonnet son lannen servis. Nou bezwen rekonnet zot leksperyans ki zot i annmennen dan servis piblik.

Msye Spiker revizyon lo saler de baz par 5% dapre latab reminerasyon e saler servis piblik pour ganny fer a parti Avril 2019 konpare parey tin ganny annonce ki ti Zilyet 2019. Nou respekte provizyon Lalwa Reminerasyon Servis Piblik, 2013. Nou pou bezwen ankor SR 21 milyon pour ki sa ogmantasyon saler i konmans Avril 2019. Nou pou demann Lasanble Nasyonal pour transfer larzan sorti dan en vot pour al dan detrwa vot pour fer sir sa ogmantasyon saler i arive e ki nou osi mentenir sa SR 8.46 bilyon bidze 2019.

An se ki konsern groser gouvernman, Msye spiker gouvernman I reste alert lo sa size. I enportan note ki a mezir ki nou donn stabilite lanplwa tou Seselwa ki dan servis piblik, nou osi bezwen rekrite pou kapab delivre. La mon fer mansyon lo bokou

sizesyon ki sa Lasanble in demande pou asire ki i annan ase resours dan bann minister pou kapab delivre. Alor gouvènmman pe fer sir ki nou balans lakantite rekritman ki nou fer e fer sir I soutenab.

Groser gouvènmman I osi relye avek nou bidze total pou saler. Nou a note ki sa I pou an 2019, SR 2.67 bilyon. Alor nou bezwen port atansyon ler nou kontinyelman promot plis logmantasyon saler e ankor plis skim saler menm si gouvènmman I annan en lapros pli rezilyan avek lenplimantasyon nouvo skim. Nou polisi si ki omwen en scheme of service I fer senk an lenplimantasyon.

Deplis, I annan bokou presyon ki pe ganny mete pou fer monte saler debaz avek kritik ki saler de baz I ba, menm si I annan bokou lezot alawens ki kapab ganny atase avek saler sa travayer. Nou le fer resorti la ki nou bezwen get ‘total package’ en travayer. Alafen di zour nou konfirman ozordi ankor Msye Spiker ki tou labank I pou donn lon en travayer si I atenn kriter sa kantite larzan ki i anvi prete e ki tou son saler, enkli alawens,

e se selman zis bann periodic alawens ki pa gany konte, ler zot fer en laplikasyon pour ganny en lon.

Alor Msye Spiker, gouvènmman i deza annan li son kad saler e kad pour bann diferan skim saler. An se moman nou annan en total 138 skim saler ki an laplikasyon e ki kontinyelman ganny revize tou le lannen an mezir i nesaser. Nou bezwen alor respekte sa, akòz alafen di zour se sa bann fo enterprestasyon ki osi kontribye dan met presyon dan groser gouvènmman.

Lo zesyon nou bann proze kapital Msye Spiker, nou rekonnèt sa 'challenge' ki nou pe eksperyansè pandan sa dernyen 10 zan. An 2013, nou ti entrodwir nou polisi lo zesyon proze kapital dan sèkter piblik, avèk lebi amelyor lafason ki proze i ganny konseptè, swazir, analize e ganny selekte. Lapwèntman en 'Development Committee' in ede pou asire bann proze kapital ki ganny konseptè par bann ministè oubyen departman i aktyelman nesaser e ki napa anbigite dan seleksyon proze.

Me par kont, defi ki nou ankor pe vwar se dan egzèkisyon proze. Depi 2016 Msye Spiker, egzèkisyon proze i ganny monitor e

raporte avek Cabinet of Ministers tou le trwa mwan, pou ki progre bann proze i ganny sirveye. Me par kont, nou rekonnèt ki nou annan bann defi enstitisyonnèl e kapasite pou asire ki nou kapab egzekit tou bann proze dan bidze.

E alors Msye Spiker se pour sa rezon ki noun deside, pour rezourd nou konstren kapasite pour rekrit 8 teknisksyen proze pour soulav sa sitiasyon. Sa i a konplimant sa 3 kin deza fini ganny rekrite par minister ledikasyon.

Msye Spiker an sa se ki konsern ki gouvènmàn pe fer en overall deficit, I byen note ki en bidze sirplis primer (primary surplus) i korekteman eskli peyman lentere lo det. Sa i alor donn en lendikasyon zefor lo zesyon bidze fiskal ki gouvènmàn pe fer, anvi ki peyman lentere i pou antyèrmàn depan lo lentere ki Gouvènmàn pe peye e groser bann defisit bidzeter dan bann lannen pase;

1. Lentere lo det domestik i baze lo market domestik e sekter monneter. Pour lannen 2019, nou pe prozekte SR 490.4 milyon pour pey lentere lo det domestik.



2. Lentere lo det eksteryer i en mwayenn 16 milyon dolar par lannen pour sa prosen trwa zan e pour lannen 2019 i SR 232.7 milyon.

Alor, pou bann pei ki annan en gran nivo det konpare avek prodwir domestic brit (GDP) parey Sesel, bidze sirplis primer i sa mezir ki ganny servi e i ganny met plis lanfaz lo la pou mezir performans bidzeter en pei, an mezir ki sa pei i redwir son nivo det. Sa i asire ki omwen pei pe fer en sirplis fiskal primer, kot depans i pli mwens ki reveni ki pei pe kolekte.

Msye Spiker, dan sa 59.6 pousan prodwir domestic brit (GDP) nou det Gouvernman, 8.6 pousan prodwir domestic brit (GDP) i reprezant det ki Gouvernman in pran pour asiste Labank Santral lo son polisi monneter. I montre ou si nou retir sa 8.6 pousan dan sa 59.6 pousan nou det lo fiskal i selman 51 pousan prodwir domestic brit (GDP). Alors menm si Gouvernman pe pran det adisyonnèl pour kouver son overall deficit bidze i pa alarman akòz i prezant 0.6 pousan prodwir domestic brit (GDP) konpare avek en balans primer 2.5 pousan prodwir domestic brit (GDP). Mon osi oule konfirmen ki sa bidze in ganny

negosye avek fon monneter enternasyonal. Alors si fon monneter enternasyonal in vwar ki nou lo bon semen pour redwir lo det anba 50 pousan prodwir domestic brit (GDP) a parti 2021.

Nou det domestik pour asiste sekter monneter i reprezant 24.7% total det domestik. Alors, dan sa SR 490.4 milyon lo peyman lenter e lo det domestik, SR 122.6 milyon i lenter e lo domestik det pour sekter monneter.

Msye Spiker, nou det eksteryer i SR 5.45 bilyon ouswa 24.9 pousan prodwir domestic brit (GDP). Sa bann det i konm swivan;

1. 37.7 pousan noun prete avek bann lenstitisyon multilateral parey ADB, BADEA, Labank Lenvestisman Eropeen, Labank Mondyal e lezot ankor.
2. 32.4 pousan noun prete avek bann private bond holders dan sa bond ki nou ti pran an 2006.
3. 12.5 pousan noun prete avek bann pei dan Paris Club parey Lafrans, Itali, Zapon e lezot ankor

4. 6.7 pousan bann det kommersyal sorti kot Nedbank, MCB, First Gulf Bank ek lezot
5. 5.4 pousan noun prete ek Lasin.
6. 3 pousan noun prete ek bann lezot pei ki pa dan Paris Club
7. 1.8 pousan noun prete ek Abu Dhabi
8. 0.5 pousan noun prete ek Lenn

Msye Spiker, konsomasyon disik an myayenn ki nou lekor i bezwen i 25 granm konpare avek konsomasyon ki Seselwa pe servi 100 granm an myayenn. Alors nou bezwen regard nou lasante e fer plis legzersis ouswa redwir konsomasyon disik.

Noun ekout konsern ki manm lasanble in fer resorti lo lentrodiksyon en fre pour preskripsyon dan sistenm lasante baze lo provizyon lartik 29 nou konstitisyon. Msye Spiker, Gouvernman pour mentenir son polisi lo lentrodiksyon sa fre preskripsyon me avan nou finaliz sa fre preskripsyon nou pou fer sir ki tou keksoz i anplas e en akor avek lankadreman legal.

Msye Spiker, konzasyon trafik i en laspe ki Gouvernman i tre konsernen avek. Departman Transpor ti anmenn en propozisyon

devan konsey bann Minis, me konsey Minis in demann  
Departman Transpor pour enkonpor propozisyon adisyonel.  
Bann legzanp;

- By pass dan Viktorya
- En sistenm eksportasyon pour bann veikil kin annan en serten laz.

Gouvernman pe osi al lans en expression of interest pour en konsiltan pour fer plan e superviz en overhead crossing pour roundabout Providans, kot lekol English River prenon an kont mouvman dimoun ler stad lanmizik i konplete, roundabout Roche Caiman e kot Eden.

Bann lezot proze ki i lo latab i konm swivan;

- Trwazyenm lane kot aveni senk Zen
- Trwazyenm lane kot Francis Rachel street
- Trwazyenm lane Pointe Larue e nou pe esper wayleave
- Revwar Plaisance roundabout e nou pe esper wayleave

- Revwar Junction kot Aveni Revolution e semen Bel Air e nou pe esper wayleave.
- Koneksyon semen Sansousi ek semen Forret Noire ki pas kot semen FEBA

Nou pe kontinyen avek bann letid pou vwar e idantifye problem trafik e pou vinn avek lezot mezir pou amelyor sirkilasyon trafik, espesyalman seksyon les mae depi Au Cap ziska Airport. E Osi en propozisyon pour entrodwir cable cars pe ganny evalye. Sa i detrwa legzanp. Sa pou ganny diskite avek sekter prive tre prosennman.

Msye Spiker, Gouvernman pe kontinyen revwar opsyon finansman pou konstrir en premye tunnel ant Cascade e Grand Anse Mahe. Bann opsyon finansman ki pe ganny analize pour fer sir i pa tous bidze e osi nou det pei pa ganny afekte.

Msye Spiker, lenerzi renouvlab i reste en priorite Gouvernman e nou panse ki sa pour anmenn bokou benefis pour lepep Seselwa lo zot bill elektrisite e osi lo kantite deviz etranzer ki nou depanse lo enportasyon karbiran. Sa proze smart energy kot

bann lakour pour ed nou bann fanmiy benefisyé a pepre SR 300 par fanmiy. Nou pou osi bezwen travay ek Minister responsab pour Lenerzi, Konmisyon Lenerzi ek PUC pour vwar sa target 15% pour prodwir lenerzi renouvlab ver 2030 si nou pa kapab aten sa target pli boner.

Msye Spiker, LNG i en konponan pour ed nou osi redwir lo kou lenerzi. Noun demann IFC pour ed nou dan sa prosedir e nou ekspekte annan en rekonmasyon sorti kot IFC pandan premye kar 2019. E sa pour ganny diskite avek tou bann partiprenan.

Msye Spiker nou bezwen regard lenvestisman dan dezyenm kab soumaren pour fer sir nou lekonomi i rezilyan avek okenn risk ki kapab arive si i annan okenn koupman avek nou sel kab soumaren ki nou annan. Dan larezyon Moris ek Madagaskar i annan 3 kab soumaren, Komor i annan 2 me tre prosennman pour annan 3. Kenya i annan 4. Msye Spiker letan i annan okenn koupman dan bann pei ki annan selman en kab soumaren, son perdmann dan lekonomi i kapab ariv plis ki 12 milyon dolar ameriken e osi son opportunity costs dan bann lenvestiman.

Msye Spiker, an 2009 the mobile broadband internet package ti SR 250 pour 0.25GB ki ti apepre SR 1,000 pour sak GB. Me an 2018, pour anviron SR 225 ou kapab aste SR 1.75GB ouswa SR 129 pour sak GB. I montre ou ki pri in desann me selman nou usage lo data osi in monte. Mon konstate nou kapab fer pli byen lo bann prodwi ki ganny ofer letan nou konpar nou avek bokou lezot pei.

Msye Spiker, Linyon pou Telekomunikasyon Enternasyonal dan Leta Zina (UN) in defini pri telekomunikasyon I afordab dan en pei ler pri pour 0.5 GB data mobayl, I pli ba ki 5% GNI par kapita. Sesel I ‘meet’ sa target anvi ki in skor 1.22% an 2016.

Sesel I osi atenn target ki pli sever ki mete par “Alliance for Affordable Internet” ki li son kriter se pou ofer 1 GB pou pli mwens ki 2% GNI per kapita. Sesel in skor 1.59% an 2016 sorti 2.76% an 2013. Sa I pli meyer ki pou Moris. Par kont pour telefonn mobil, Sesel pan skor pli byen ki Moris me pri in desann sorti 1.86% nou prodwi domestic brit an 2010 pou ariv 1.1% an 2016.

I osi I enportan note ki an se ki konsern ‘broadband’, pli ou aste, pli I vin pli bon marse. Alor pou en lekonomi avek pli mwens ki 100,000 abitan, I pou touzour en konstren pou konpar avek bann lezot pei avek plis abitan e alor ki annan plis pouvwar asa. Lokasyon oubyen nou izolasyon zeografik I zwe en gran rol osi dan pri.

Alor nou ankouraz bann lakonpanyen telekominikasyon, pou ouver prodwi ki zot ofer, tel ki ‘unlimited broadband’ pou mobayl etc.

Komisyon Reveni Sesel in konplet 27 odit an 2017 pour bann gran biznes avek en total evalyason SR 59.6 milyon. Ziska Septanm 2018, Komisyon Reveni Sesel in konplet 22 odit avek en evalasyon SR 28.8 milyon. Msye Spiker, nou pe osi travay lo en sistenm elektronik pour monitor bann reveni par bann marsan direk ek sistenm Komisyon Reveni. Bann marsan pour bezwen servi en *electronic cash register* ki pour ganny sertifye par Konmisyon Reveni. Sa sistenm pour ganny diskite avek sekter prive an 2019 letan nou pe revwar sistenm elektronik konmisyon



Reveni. Mon konstate avek en tel sistenm nou pou ed Konmisyon Reveni pour anmas plis taks.

Msye Spiker, sanksyon lo lavant lotel Banyan Tree in ganny prozekte dan bidze 2018 e nou ekspekte ganny sa reveni pandan mwan Novanm. Nou pe finaliz diskisyon ek Cable and Wireless e noun prozekte reveni lo sanksyon lavant an 2019.

Nou pou fer sir ki nou kolekte sa taks lo bann propriyete imobilye ki pour bann etranze letan lalwa i ganny finalize. Nou pou met en sistenm an plas pour fer sir ki sa bann evalyason lo sa bann propriyete i ganny evalye dan en fason zis.

Sa bann konsesyon taks endirek lo karbiran ki nou pe fer par en lapros anilasyon gradyel an 2019 e 2020 nou pou bezwen extend sa sertifika TIA pou met sa bann nouvo lapros gradyel dan konteni sa bann sertifika.

Msye Spiker, nou ti prozekte pour kolekte en reveni SR 83.97 milyon an 2018 lo laysens telekominikasyon baze lo estimasyon krwasans dan sa sekter me noun reviz nou prozeksyon pour

kolekte SR 78.2 milyon baze dan krwasans aktyel dan sa sekter. Letan nou konpar sa avek 2017 ki ti SR 69.7 milyon e annan en logmantasyon. Pour lannen 2019 noun prozekte SR 84.9 milyon dan laysens telekominikasyon.

Gouvernman in fer son langazman pour travay ek Labank Modyal pour vwar soutenabilite bann benefis program sosyal. Propozisyon pour bann pansyonner ki par lao 80 an, 90 an nou bann santener pour ganny analize e prenon an kont ler nou pe fer sa legzersis. Sa travay in konmanse e i pour kontinyen pandan lannen 2019.

Msye Spiker, STC pour kontinyen abzorb kou transportasyon lo komodite esyansyel pour fer sir ki i mentenir pri sa 14 komodite esyansyel lo Pralen ek Ladig. STC in osi kapab mentenir pri sa 14 komodite esyansyel depi 2012 ziska prezan menm si rroupi in depresye e osi kou transportasyon i ogmante. Msye Spiker, STC in aste sa propriete parti lepep kot builders' depot pour lavalal SR 17 milyon. Dernyen peyman lokasyon manysel ti an Zen 2018.

Msye Spiker, an se ki konsern plan gouvènmàn lo sa fleo drog ki nou pe eksperyansè, nou latas i kontinyen pour lannen 2019, e sa pou entansifye zefor kin deza komansè pou donn tretman e reabilitasyon nou bann dimoun ki malerezman in tonm dan adiksyon avek sa sibstans. I annan diferan tretman ek bann program reabilitasyon ki APDAR pe zere. Enn sa bann program prensipal se ‘the low threshold methadone programme’ ki pe ganny servi pou target lamazorite dan sa bann 5,000 a 6,000 adik ki APDAR i swete met lo tretman. Sa program in gany prouve pou etre efektiv e i baze lo Pratik enternasyonal.

Lot program ki annan se ‘the high threshold maintenance program’, e la regilasyon I pli kontrole an konparezon avek sa lot program ‘ low threshold’, e apard metadonn, ‘Buprenorphine’ e ‘Naltrexone’ I osi pe ganny servi koman bann sibstitisyon pou ‘Opiod’. Pou le moman, sa lazans pa kapab fer okenn lezot program, espesyalman enn rezidansyel anvi ki napa en sant reabilitasyon apropriye. Par kont, Gouvènmàn in propoz en bidze SR 14.3 milyon dan bidze 2019 pour konmans konstrir sa sant reabilitasyon.

Dan tou sa bann konstrent, APDAR pe amelyor son kapasite annatandan, par anploy bann profesyonnel e lantrennman kontinyel dan sa domenn. Diskisyon avek Minister Ledikasyon pe osi gany fer pou develop en program prevansyon vize a bann zelev. Tre byento pou annan lansman en “National Drug Control Master Plan”, kot bann diferan minister pou gany bann diferan responsabilite viza-vi zot rol dan sa lager kont sa fleo drog.

Msye Spiker sa sonm SR 6.6 milyon kin ganny mete dan liv bidze dan seksyon 4 pour saler bann lapwentman konstitisyonnal paz 1, i sonm ki pa ti ganny donner pour Prezidan, Vis Prezidan e 6 Minis pour zot end of gratuity an 2015 ler eleksyon Prezidansyel ti ganny fer. Mon koriz manm onorab, ki sa sonm pa relye avek okenn eleksyon me par kont relye pour koriz en anormali kin arive an 2015. Bann lezot Minis kin nepli dan Gouvernman tin fini ganny peye zot end of term gratuity ler zot ti kit Gouvernman.

Msye Spiker, bokou in ganny dir pandan sa bann zour par tou nou sours popilasyon. Gouvernman i bezwen fer sir ki nou prezant en bidze responsab ki nou war progre pour lavenir. Nou

ti kapab vin avek en bidze kot tou dimoun i ganny son saler double. Me sa, pa pou en bidze responsab ki prenon kont tou laspe nou lekonomi. Me nou pare pou asize e ekoute e fer sir ki nou pep i konpran propozisyon Gouvernman.

Nou osi bezwen asize ek sekter prive pour fer sir lepep Seselwa I ganny the best deal. Letan nou koz pri lavi, Gouvernman i bezwen fer son bout e osi sekter prive i bezwen fer zot bout.

Mon pe donn mon langazman avek lepep Seselwa pour lenplimantasyon bidze 2019. Noun anons bokou keksoz dan bidze 2019 me nou bezwen fer sir ki nou enplimant sa bann polisi ek program pandan lannen 2019.

Msye Spiker, nou pe al dan staz konmite pou vwar bidze sak Minister, Departman ek Lazans, i annan larepons ki mon pan donner dan mon larepons e mon bann koleg Minis pour koz plis lo la.

Tenm bidze 2019 i lo stabilite ek progresyon. Noun war kot nou ti ete an 2008 avan nou reform makroekonomik. Me i annan bokou progre ki nou bezwen fer ansanm pou nou akonpli plis ankor pour nou menm e pour nou zanfan demen.

Myse Spiker mon demann tou Onorab pou siport bidze 2019 avek bi kontinyen nou progre pou Sesel e byenet Nasyon Seselwa.

Mersi Msye Spiker